

Kaapiya la vu hil bel-ate sen lavand Hibluu-to

Anutu vu vakasin vu Noow-ambe nêêl vu yiyi

1 ¹ Vu bôôy ond Anutu nêêl vakasin ngeeyaata vu hil sen danêêl yite vakasin langaah-ato lak mopaatôôv vaha vaha be lanêêl vu yate himbop-aso bôôy, ² ^ale sim busin taamusin sen gêên-anjo tombe Anutu yoo vu vakasin vu Noow-ambe nêêl langaah vu yiyi. Yik Noow-anju sen Anutu nêêl-ambe yoo hatung yendak osin ngaanggis pin, tombe holin yi be mem vu va baandoni osin voon pin lukala nama. ³ ^bYik yii-ju Anutu-te melangaah nikaapulis-ate, tombe yik ni nambe Anutu keen-ato, de yoo navu kaandu va pin sen hatung-ato lak yite vakasin aniwêêk. Yoo kawiiy hil-ate nipaya lung la, de laah nando having Anutu sen niwêêk danggakook-ato ond nando nama vasa having yi vu baandoni.

Anutu Noow savok angela-so

⁴ ^cKe, om Anutu Noow tu bopaata lôôt-ambe savok angela-so la, tonde yik hako haale bopaata vu Anutu be savok sil haalend la. ⁵ ^dLohvu Anutu nêêl nambe,

“Sa noongg hong in gêên soo hako hong.”

Tonde yik nêêl ango nambe,

“Sale naatu yite mangganaan, de le naatu sa noongg.”

Mak naangelis Anutu nêêl vakasin-anjo lak angela ti? Malis. ⁶ ^eYik busin sen Anutu navu biing nowaatuk timu dukanaam voon-ato ond mem nêêl nambe,

“Sate angela pin yoo gatung kaatu vu yi.”

⁷ ^fTonde nêêl ak angela-so nambe,

^a 1:2 Saam 2:8; Mat 21:38; Jon 1:3; Kol 1:16 ^b 1:3 2Ko 4:4; Sin 2:33-34; Kol 1:15; Hiblu 8:1
^c 1:4 Pil 2:9 ^d 1:5 Sin 13:33; Hiblu 5:5; 2 Sml 7:14; Saam 2:7 ^e 1:6 Lom 8:29; Saam 97:7
^f 1:7 Saam 104:4

“Sa samu sate angela-so nambe vavi, de
sa naawiing-ambe sil lalohvu kin dalaan.”

^{8g}Tonde sim nêêl angôô-jo lak Noow nambe,

“O Anutu, gatu omaaho lulemak-ambe goo le mando mongganggin
gate hil jak vakasin anivalok danggata osin danggata. ⁹In gahem
oo having va nivalok amu, de ganimbaya vakasin kalêêsin, ondeey
yik sa sen gate Anutu saa-to ond saaholin hong, tombe saawiing-
ambe gakam vasa lôôt savok gate hil pin.”

^{10h}Tonde nêêl boow ango yesin laah nambe,

“Omaaho Bop, goo hatung ngaanggis vu munggin, tombe yik osamu
yendak ak onamam having, ¹¹lemu yendak osin ngaanggis e na
menama pin, nganjo hong ond le nama, goo nando in mando
danggata-te. De yendak osin ngaanggis ond le nimbôôy jak
naambe lolop animbôôy ak-ato, ¹²tombe gale baahinin naambe
sen hil daahinin tôômb-ato, de gale ganggilin va naatu moos
dukanaah naambe sen hil dalop lolop moos lukalaah sil-ato. Lemu
hong Omaaho Bop, goo le mando naambêênja danggata lôôt, de
game le tata jak e.”

¹³ⁱIn bôôy Anutu nêêl nambe,

“Omando sa namangg vasa gaving sa de sale aambiing-ambe hil sen
dayi hong payaa-to le langgulis hong vaalu kambi.”

Tombe mak Anutu nêêl vakasin-anjo vu angela-so ti? Malis. ^{14j}Angela-
so pin ond sil latu Anutu-te va kul-ate, tombe Anutu nawiing-ambe sil
dala in nambe landôôvu hil sen navu gako sil lanom vu yii-to.

Anutu hako yiyi lom-ato ond manyinjo va bopaata ti keen

2 ¹Om vakasin sen yiyi hangoyin-ato ond yakangg bu be yiyi oo naapuvu
niwêêk, de yame yanitambo jak-ambe yiyi gavuu na le. ^{2k}In bôôy ond
Anutu vu vakasin vu angela-so be lanêêl langaah, tombe vakasin-anju ond
nôôn keen, om hil pin sen nanyend doos-ambe sil kalêêh vakasin-anjuuto
ond lako nipaya nyevahaan ak. ^{3l}Lemu gêên ond Anutu hako yiyi lom, tombe
manyinjo va bopaata ti keen lôôt, om naambe yiyi galuuh damingg vu va
bopaataa-ju ond yale napak in yate nipaya nyevahaan-ambe yana tana?
Malis. Yik Omaaho Bop oo nêêl vakasin munggin nambe le gako yiyi nom,
tombe hil sen lango yite vakasin-anjuuto ond lanêêl langaah vu yiyi nambe
vakasin-anju keen lôôt. ^{4m}Tonde yik Anutu yoo

kaandu vakasin-anju lak sen vu niwêêk vu yite hil-ambe lawiing taahu
taahu ngeeyaata osin niwêêk, osin hatiyy Vavi Vaambuung-ate niwêêk
kul-ate nyemalis amu vu hil lohvu yoo ahe having-ato.

^g 1:8 Saam 45:6-7 ^h 1:10 Saam 102:25-27 ⁱ 1:13 Saam 110:1 ^j 1:14 Saam 34:7; 91:11

^k 2:2 Gal 3:19 ^l 2:3 Hiblu 10:29; 12:25 ^m 2:4 Mak 16:20; 1Ko 12:4,11

Yesu tu yate omaaho sen hako yiyi lom-ato danggakook keen

⁵Kul sen ganggin omaahonôôn nohvu taaku pin sen yiyi nakaas in-anjo, ond Anutu me-vu kul-anjo lukala angela-so namand e, malis.

⁶In omaaho ti kaavu boow ti neep hôôk kaapiya be nêêl langaah nambe,

“O Anutu, omaahonôôn ond sil vaati ondeey gakam navu sil? De omaahonôôn noondin ond sil vaati ondeey onanggin sil nivasa?

⁷Le sim olaanggôôl omaahonôôn-ambe haalend pasiv de angela-so haalend bop savok omaahonôôn la daka, le ma de gavu nikaapulisi osin haalend bop vu sil-ambe mem ohako sil lak,

⁸tonde gawiing-ambe va pin lahulis sil vaalu kambi in nambe sil oo ganggin pin.”

Keen, Anutu hatung va pin lahulis omaahonôôn baambu, de me-havuuh vati be nando malis in nambe me-gulis baambu le, lemu gêên yaahe nambe va pin-ame lahulis omaahonôôn baambu le, malis.

⁹Nganjo Yesu ond mem, in yaahe nambe Anutu laanggôôl Yesu be haale pasiv de angela-so haalend bop savok yi daka vêêl e, tombe hako nivaane be yimb, le sim gêên Anutu hako yi lak-ambe vu va nikaapulisi-ate vu yi, osin wiing-ambe haale tu bopaata lak. Keen, Anutu-te samu samu bopaata ondeey Yesu yimb in dôôvu hil pin.

¹⁰De Anutu sen yoo hatung va pin-ambe va pin danggakook yii-to, ond nawiingin nambe naanggiy hil ngeeyaata lana vu yi in sil daatu yite noow-aso be gako yite nikaapulisi. Om yoo wiing va lohvu be vu nivaane vu Yesu, tombe nivaanêê-ju wiing-ambe Yesu tu omaaho nyemalu nivasa nôôn in nambe gako sil nom.

¹¹Ke, Yesuu-ju nawiing-ambe hil datu vaambuung, tombe yoo having hil pin sen nawiing-ambe sil datu vaambuung-ato, ond sil ahondoos pin maandin timu, ondeey Yesu nanêêl sil nambe yite halindin, de me-yi

sil nambe va malis-ambe natu ka in sil e. ¹²Tonde nêêl nambe,

“O Anutu, sale naanêêl ohaalem langaah vu sa halingg-aso. Keen, sale aambiing laalo in sa gako ohaalem jak dôôk hil bel-ate lavuun.”

¹³De yik nêêl ango laah nambe,

“Sa longgpaya le na timu vu Anutu keen.”

Tonde sim nêêl ti laah nambe,

“Angge, sa de sate unoopasiv-aso sen Anutu vu vu saa-to nganjo.”

ⁿ 2:6 Saam 8:4-6 ^o 2:8 1Ko 15:27 ^p 2:9 Pil 2:8-9 ^q 2:10 Lom 11:36 ^r 2:11 Mat 25:40; Mak 3:35; Jon 20:17 ^s 2:12 Saam 22:22 ^t 2:13 Ais 8:17-18

Yesu tu omaahonôôn keen in nambe dôôvu yiyi

¹⁴ "Om unoopasiv-asôônju ond sil omaahonôôn, tombe yik Yesu tu omaahonôôn-ambe ni nambe sil having. Wiing nambêênju in nambe yoo jimb, tombe yite yimbin-anju daanggôôl Saalang sen yite niwêêk neep-ambe nayiis hil dayimb-ato na. ¹⁵ In omaahonôôn dayêênin yimbin, tombe lak busin pin sen dando voon-anjôôto ond niyenin-anjo nanduuh sil tatin, om Yesu yimb in nambe nôôh sil vêêl in niyenin-anju. ¹⁶ "Keen lôôt, me-nawiiing in nambe dôôvu angela-so le, nganjo nawiiing in nambe dôôvu hil sen silate danggakook neep vu Abalaam-ato. ¹⁷ "Nambêênju ondeey yoo tu ni nambe halindin-asôôto keen, in nambe mem naatu yêêv bop salivangin-ate be yoo ka pasiv in omaahonôôn osin biing Anutu-te kul nivasa lôôt, tombe yik yoo gatung yi naatu salivangin in kawiiy hil-ate nipaya na. ¹⁸ "De yoo hako nivaane pin sen tovu yi be sahi yii-to, om yik yoo lohvu nambe dôôvu hil sen sahisin natovu sil-ato.

Yesu haale bop savok Mose la

3 ¹ "Om halingg-aso sen ham atu Anutu-te hil vaambuung-ato, Anutu sen nando baandonii-to ond teey ham having, om yik ham akam oo bu Yesu sen tu sinaale bop osin yêêv bop salivangin-atêêto nivasa, in yiyi naawii-having yi be yiyi naanêêl haale langaah-ato. ² "Yesuu-ja ond samu Anutu sen holin yii-to yite kul pin nivasa, yik nambe sen Mose yoo samu Anutu-te kul pin nivasa vu Anutu-te hil bôôy-ato. ³ Omaaho sen nahaav bayêên-ato ond haale bop savok bayêên sen nahaav-ato la, yik nambe sen Yesu ond yoo nivasa, om lohvu le gako haale bop savok Mose na. ⁴ In bayêên pin ond omaahonôôn dahaav, lemu omaaho sen hatung va pin-ato ond yik Anutu. ⁵ "Mose ond tu Anutu-te kul vaha be yoo wiing va pin nivasa hôôk Anutu-te hil lavuun. Mosêê-ju yite kul nambe naanêêl va sen Anutu navu biing vu taamusin-ato. ⁶ "Nganjo Kalisi ond Anutu Noow, tombe yite kul nambe tu yêêv bop-ambe nanggîn Anutu-te hil, tombe yik nawiiing kul-anjo nivasa, om naambe yaambiing gaving yi niwêêk jak busin pin-ambe yiyi monggatung mengg in osin yiyi naapêêlis, ond mem yaatu Anutu-te hil keen.

Kalêêsin ambu-so ond sil-ame le sawaah naavind e

⁷ "Om yiyi nanyengg vuun in Vavi Vaambuung-ate vakasin-anjo nambe, "Peey-anjo naambe ham gango Anutu lava, ⁸ "ond ham alompayo me-niwêêk jak lôôt naambe sen hil latee sil ak-ambe sil kalêêh

" 2:14 Jon 12:31; 1Jon 3:8; Taato 12:10 ¹ 2:16 Ais 41:8-9 ² 2:17 Pil 2:7; Hiblu 2:14; 1Jon 2:2; 4:10 ³ 2:18 Hiblu 4:15 ⁴ 3:1 Hiblu 4:14; 6:20; 7:26; 8:1; 9:11 ⁵ 3:2 Nam 12:7
^a 3:5 Nam 12:7 ^b 3:6 Kol 1:23; Hiblu 3:14 ^c 3:7 Saam 95:7-11 ^d 3:8 Eks 17:7;
 Nam 20:2-5

lava osin sil sahi Anutu, bôôy sen lala dando taaku lumbalaamb-ato, ond yoo londpayo niwêêk lôôt.”

⁹Tombe Anutu nêêl nambe,

“Vu taaku lumbalaamb-anju hamate himbop-aso bôôy layi va pin sen saawiing vu sil lohvu ta doo-yuuh-ato, le ma de sil oo davu sahi sa lak va ngeeyaata lôôt ¹⁰ondeey sahengg kalin vu sil-anju, be saanêêl nambe sil akand oo nala paya lôôt-ambe sil daahen doosin sate mopaatôôv.

¹¹“Tombe sa longgpayo nivaane be saanêêl keen lôôt nambe sil-ame le landukanaam sate taaku sawaasin-anjo le, malis lôôt.”

Yame kalêêh Anutu lava naambe hil Islel-ato le

¹²Halingg-aso, ham oo ganggin ham nivasa, in sim ham ti lopayo nipaya le biing-ambe me-le biing gaving keen e, tombe sim le galuuh dami vu Anutu metumin-atêêto. ¹³Om gêên-anjo ond yik busin sen Anutu nêêl nambe “peey-anjo,” om ham oo kaandu ham lak vakasin jak busin pin-ambe peey-anjo jung na le, in va nipaya le tatuhin ham ti, tombe sim le gilin lopayo be niwêêk jak. ¹⁴In yaawii-having Yesu nyendoos-ato, ond yik gêên-anjo yiy aambiing gaving niwêêk lôôt-ambe na balup busin sen yaanggimb-ato le mem. Ke, yaambiing naambêênjo ond mem yaatu nôôn timu having Kalisi keen.

¹⁵^gVakasin-anjo naahen neep nambe,

“Peey-anjo naambe ham gango Anutu lava ond ham alompayo me-niwêêk jak lôôt naambe sen bôôy hil latee sil ak-ambe sil kalêêh lavaa-to le.”

¹⁶^hMak vu bôôy ond hil tana lango Anutu lava, le ma de sil latee sil ak-ambe sil kalêêh lava? Hil pin sen Mose giyy sil vu Ijip-ambe lalaa-to, ond yik hil-anju kalêêh Anutu lava. ¹⁷ⁱTonde hil tana sen lawiing-ambe Anutu ahekalin vu sil lohvu ta doo-yuuh-ato? Yik hil sen lawiing va nipaya be layimb-ambe naavind neep panyek vu taaku lumbalaamb-ato ond yik Anutu ahekalin vu hil-anju. ¹⁸^jDe mak hil tana sen Anutu nêêl keen lôôt nambe sil-ame le landukana yite taaku sawaasin-ato le? Yik nêêl lak hil sen sil kalêêh lavaa-juuto. ¹⁹Om yalak ni nambe sil-ame lawii-having e, om manyinju sil-ame lalukala Anutu-te taaku sawaasin-ato le.

Anutu-te hil sawaah sil-ambe mando gaving yi

4 ¹Vakasin sen Anutu jôôy nambe yite hil e landukana yite taaku sawaasin-ato naahen neep, om yanning oo jêênin yiy in mak ham ti le na balup monaativak mando mop lavuun, de me-le dukana Anutu-te

^e 3:11 Nam 14:21-23 ^f 3:14 Hiblu 3:6 ^g 3:15 Saam 95:7-8; Hiblu 3:7-8

^h 3:16-18 Nam 14:1-35 ⁱ 3:17 1Ko 10:10 ^j 3:18 Hiblu 3:11

taaku sawaasin-atêêto le. ²Yiyy hango banye nivasa nambe sen hil Islel lango bôôy-ato, lemu banye nivasa sen Islel langôô-ju ond me-hôôvu sil e, in yoo lango malis amu, de me-lawii-having e. ³^kNganjo yiyy sen yaawii-having-ato ond mem yiyy naalukala Anutu-te taaku sawaasin-atêêto. In bôôy Anutu nêêl nambe,

“Sa longgpayo nivaane be saanêêl keen lôôt nambe sil-ame le landukanaam sate taaku sawaasin-anjo le, malis lôôt.”

Ke, Anutu-te taaku sawaasin-anjo ond yoo samu lung la bôôy sen hatung ngaanggis ayuuh va pin lung la de sawaah yii-to. ⁴^lSil kaavu Anutu-te vakasin ti neep, sen nêêl ak busin namaavaalu be vindak yuuh-ato nambe,

“Anutu wiing yite kul pin-ambe lung la, tonde busin sen tu vindak yuuh-ato ond sawaah.”

⁵^mTonde yik vakasin ango nêêl yesin laah nambe,

“Sil-ame le landukanaam sate taaku sawaasin-anjo le, malis lôôt.”

⁶Tombe vakasin-anjo yoo naahen neep, om hil vaalu le landukana yite taaku sawaasin-ato, nganjo hil sen lango banye nivasa bôôy-ato ond sil kalêêh, ondeey me-lalukala taaku sawaasin-atêêto le. ⁷ⁿOm Anutu yoo holin busin ango yesin laah-ambe nêêl busin-anjo haale nambe peey-anjo. In ta ngeeyaata lung la vêêl e mem Devit nêêl Anutu-te vakasin ti sen yaanêêl lung laa-to nambe,

“Peey-anjo naambe ham gango Anutu lava ond ham alompayo me-niwêêk jak lôôt e.”

⁸^oNambe bôôy Yosua bu sawaasin vu sil, ond Anutu me-le naanêêl busin ango vu sil vu taamusin e. ⁹Om yalak ni nambe busin sawaasin keen-ato naahen neep nanggin Anutu-te hil. ¹⁰^pNambe omaaho ti dukana Anutu-te taaku sawaasin-ato, ond manyinjo wiing yite kul lung la de navu sawaah yi, yik nambe sen bôôy Anutu wiing yite kul lung la de sawaah yii-to. ¹¹Om yiyy oo niwêêk lôôt in yaandukana taaku sawaasin-anjo, in omaaho ti kalêêh vakasin naambe sen hil lawiing bôôy-ato, ond le na balup monaativak mando mop lavuun, de me-le dukana Anutu-te taaku sawaasin-atêêto le.

¹²^qIn Anutu-te vakasin ond metumin-ambe niwêêk neep. De Anutu-te vakasin yoo navu ngali lôôt, savok yipak diin sen navu vaalu vaaluu-to. In yipak diin ond lohvu nambe na ganggwang omaahonôôn alopayo be bayaalin lumandus osin taambelak, nganjo Anutu-te vakasin ond mem nala nanggwang omaahonôôn alondpayo keen-ambe nayaalin nôôn osin kanu. Yik Anutu-te vakasin yoo navu taato va pin sen yakangg navu

^k 4:3 Saam 95:11; Hiblu 3:11 ^l 4:4 Jen 2:2 ^m 4:5 Saam 95:11 ⁿ 4:7 Saam 95:7-8

^o 4:8 Diu 31:7; Jos 22:4 ^p 4:10 Jen 2:2 ^q 4:12 1Pi 1:23; Ep 6:17; Taato 1:16; 19:15; Jon 12:48

hôôk yalonggpâyô-to langaah. ¹³De va pin sen Anutu hatung-ato ond ti me-lohvu nambe gôôpis in yi le, malis. Yik va pin katekin-ambe nando melangaah keen hôôk Anutu me, tombe yik yii-ju sen yale aambiing vakasin vu yii-to.

Yesu tu yate yêêv bop salivangin-ate keen

¹⁴Ke, yate yêêv bop salivangin-ate Yesu sen Anutu Noow-ato nando be lakala baandoni lôôt, om yik yiiy oo naanêêl vakasin sen yaawii-having-ato langaah lôôt, de yame gavuuu daka le. ¹⁵*Yiiy ond yame aalohvu nambe yiiy daanggôôl va nipaya le, de yate yêêv bop salivangin-atêêto ond me-lohvu omaaho ango in nambe me-doosin yalonggpâyô nipayaa-jo le, nganjo yoo lak ni lôôt, in palapin pin sen natovu yiiy-ato ond yik palapin-anju pin tovu yi having lung la, lemu yoo lakin yi in va nipaya. ¹⁶†Om yik yiiy alonggpâyô timu be yana ngaaho vu Anutu, de yame aanjêênin e, in yi omaaho samu samu. Ke, yana vu yi, ond le ka pasiv in yiiy-ambe biing samu samu vu yiiy, de dôôvu yiiy in nimeen sen natovu yiiy-ato.

Yesu tu yêêv bop salivangin-ate keen om hako yiiy lom

5 ¹Anutu yoo naholin omaahonôôn datu kul vaha sen datang salivangin-ato silate yêêv bop-aso be natung sil hôôk yite kul. Tombe silate kul nambe sil daale Anutu me be sil davu samu omaahonôôn pin-ate vakasin vu Anutu, tonde silate kul nambe sil datang vanôôn natu salivangin vu Anutu, osin sil dayiis vahivak-ambe davu kaasêêh nihees natu salivangin vu Anutu in nambe kawiiy omaahonôôn-ate nipaya na. ²‡Tombe kul vaha sen datang salivangin-ato silate yêêv bop-aso ond yoo lalohvu nambe lambiing va melaas vu hil sen sil doosin-ambe dawiing va nipayaa-to, osin hil sen lavuuu Anutu-te mop laa-to. In yik yêêv-asôônju lalak ni nambe silanêênd niwêêk ma having nambêênjo, om va nipaya lohvu nambe kape

sil gaving, ³‡ondeey datang salivangin in nambe Anutu kawiiy hil pin-ate nipaya na, tonde yik Anutu kawiiy silate nipaya na gaving.

⁴‡Ke, kul sen yêêv bop salivangin-atêênju ond kul osin haale bop lôôt, tombe omaaho ti me-yoo naholin yi lak-ambe nawiing kul-anjo le, nganjo Anutu naateey yi naamunggin-ambe bu kul vu, le mem gako kul-anjo jak, naambe sen teey Aalon bôôy in kul-anjôôto.

⁵*Tonde Kalisi ond yik me-hatee yi lak-ambe yoo tu yêêv bop salivangin-ate le, nganjo yik Anutu yoo holin yi be vu kul-anjo hôôk nama, in nêêl vu nambe,

† 4:14 Hiblu 3:1; 10:23 * 4:15 Hiblu 2:17 ‡ 4:16 Hiblu 10:19 ¶ 5:2 Hiblu 4:15

‡ 5:3 Lev 9:7; 16:6 ¶ 5:4 Eks 28:1 * 5:5 Hiblu 1:5; Saam 2:7

“Sa noongg hong, in gêên soo hako hong.”

⁶De yik nêêl boow anggo having nambe,

“Hong kul vaha salivangin-ate ti nambe sen Melkisedek-ato be goo le mando naambêênja danggata-te.”

⁷Bôôy sen Yesu tu omaahonôn-ambe nando voon-ato ond nalohak-ambe navu kataangg osin susin bopaata be meluk laam having, yik navu kataangg Anutu sen yoo lohvu nambe bu vêêl yi in yimbin, tonde Yesu yoo laanggôôl yi be hulis Anutu baambu ondeey Anutu hango yite lohakin. ⁸“Yesuu-ju yi Anutu Noow, lemu hango nivaane bopaata be taato nambe yoo nanye vuun vu Anutu lava lôôt. ⁹Yoo nanye vuun in Anutu-te vakasin pin nambêênju, ond manyinju taato nambe yoo nivasa nôôn osin doos, tombe mem tu hil pin sen nanyend vuun vu yii-to silate omaaho nyemalu, in nambe gako sil pin nom in sil mando nivasa danggata osin danggata. ¹⁰^bYik Anutu yoo nêêl Yesu nambe yêêv bop salivangin-ate yik nambe sen Melkisedek-ato.

Yame mando naambe sen unoopasiv-ato le

¹¹Yesu-te kul sen yêêv bop salivangin-atêênjo ond yite vakasin ngeeyaata neep-ambe hey aawiingin nambe naanêêl vu ham, lemu ham alumkook doos ak om ham-ame alak ni le, ondeey hey naawiing kul bopaata lôôt in nambe hey tatekin vakasin-anju danggakook vu ham e.

¹²“Ham hango tanasin ngeeyaata lung la, om gêên ond

yik ham oo alohvu nambe ham taahu hil vaalu, le ma de ham nativak in kakook, om omaaho ti taahu ham hôôk Anutu-te tanasin danggakook nyemaluu-to jesin naah, in

ham-ame alohvu nambe ham angga vanôn aniwêêk e, nganjo ham alohvu nambe ham naanum sum amu. ¹³Yiyy oo alak ni nambe hil sen daahen mondanum sum-ato ond yik sil daahen dando nambe unoopasiv-ato, om sil doosin va nivalok. ¹⁴^dNganjo hil sen daya vanôn aniwêêk-ato ond sil bop ak lung la. Hil nambêênju ond kand oo navu va nivasa be davu sahi va nivasa osin va nipaya.

Yaambiing gaving niwêêk lôôt-ande yame galuuh damingg vu Anutu le

6 ¹eKe, yiyy tatekin Kalisi-te vakasin vaalu be yiyy anjak danggakook ani vanuh, de yite vakasin danggakook nyendoos pin sen yiyy hango balon balon-ato ond yaambiing gaving amu de yame tatekin vu yiyy jesin naah e. Om yame monaanêêl vakasin danggakook sen yiyy hango nyendoos-ato vu yiyy jesin naah naambe hil galuuh damind vu silate kul sen dawiiing in nambe bu metumin vu sil, le ma de davu lana

^y 5:6 Saam 110:4; Hiblu 6:20; 7:1,17 ^z 5:7 Mat 26:39-46 ^a 5:8 Pil 2:6-8

^b 5:10 Saam 110:4 ^c 5:12 1Ko 3:1-3 ^d 5:14 Lom 16:19; Pil 1:10 ^e 6:1 Hiblu 9:14

mend namaa-to, de langgilin sil alondpayo be lambiing gaving Anutu.
²Tonde yame naanêl tanasin sen belipisin osin yiy gambe namangg jak hil sen dawiing Anutu-te kul-ato, tonde yame naanêl tanasin sen hil yimbin pin kandi jak naah-ato, de yame naanêl tanasin sen Anutu le gatiy hil anipaya be lana mend nama valok-atêto le. Yame monaanêl tanasin-anjo jesin naah e, nganjo yiy naanêl Kalisi-te tanasin vaalu in nambe yanjak ni vanuh. ³Om naambe Anutu dôovu yiy ond yale naanêl vakasin vaalu naambêenja.

⁴Hil vaalu ond lango Anutu-te vakasin atombe vu melangaah vu sil-ambe lalak Anutu-te va nôon keen sen vu nyemalis amu laam vu baandonii-to ni, tombe Vavi Vaambuung lukando sil. ⁵Tombe sil sahi Anutu-te vakasin e lalak ni nambe nivasa lôôt, osin sil layi Anutu-te niwêek vu taamusin-anjo nambe niwêek bopaata. ⁶Om naambe hil-anju lambiing va nipaya be galuuh damind vu Anutu, ond manyinju sil oo layiis Anutu Noow lakalaah haah pako yesin laah. Lasi lakala in nambe hil lambiing kangasin vu yi, om silanênd mop sen langgilin sil alondpayo nom-ato ma. ⁷In ngaanggis sen luk natolak-ambe nako niluk vu lak busin pin, tombe nayiis nôon anivasa be nahôovu hil sen daalôoh-ato, ond Anutu navu samu ngaanggis-anju. ⁸Nganjo naambe taavêet vaha vaha balup hôok amu, ond manyinju ngaanggis anipaya, om manyinju ngaaho lak in Anutu navu talôôt ngaanggis-anju tombe taamusin e kin e ja.

⁹Sate va-so, hey naavu kôovu ham nambêenjo, lemu yik hey aawii-having nambe nimeen-anju me-le naatovu ham e, nganjo Anutu le gako ham nom atombe ham e anyiis nôon anivasa. ¹⁰In Anutu ond me-omaaho nipaya be ka me-nalingin hamate va pin sen ham nawiing, osin ka me-nalingin hamate ahe havingin e, in ham taato nambe ham ahem having Anutu lak va sen ham nahôovu yite hil pin, tombe yik ham oo naahen monawiing nambêenjo lôôt. ¹¹Tombe yik hey aawiing nambe ham pin oo ambiing kul aniwêek naambêenja lôôt, tonde ham oo ambiing gaving osin ham monggatung mem in sen Anutu gako ham nom-ato lôôt-ambe hamate busin jung na. ¹²Ham-ame nitambo jak e, yik ham oo sapa hil sen lawii-having niwêek-ato vahand, in sil-ame nitambo nalak e, yoo daale niwêek lôôt-ambe dako va sen Anutu jôoy bôoy nambe le biing vu yite noondin-asôoto.

Yiy aambiing gaving Anutu-te vakasin sen jôoy niwêek-ato

¹³Anutu jôoy vakasin having Abalaam bôoy-ato, ond omaaho ti me-bopaata savok Anutu in nambe Anutu naanjôoy vakasin jak haale keen

^f 6:5 1Pi 2:3 ^{*} 6:6 Mat 12:31; Hiblu 10:26-27; 1Jon 5:16 ^h 6:8 Jen 3:17-18

ⁱ 6:10 Hiblu 10:32-34 ^j 6:11 Hiblu 3:14

e, malis, om yik Anutu yoo jôôy vakasin ak haale. ¹⁴^kAnutu nêêl nambe, “Saanêêl keen lôôt nambe sale aambiing samu samu bopaata vu hong, tonde saambiing-ambe noom-asote hil vu taamusin daatu ngeeyaata lôôt.” ¹⁵Om Abalaam oo monanggin lôôt de me-nitambo lak e, tonde sim taamusin atombe Abalaam hako va pin lohvu sen Anutu nêêl vu munggin nambe biing vu yii-to. ¹⁶^lOmaahonôôn lawiingin nambe kaandu silate vakasin naambe keen ond danêêl himbop sen kaluuh sil-ato haalend having de davu taato namand lak baandoni, tombe dahilin omaaho angos sen nawiingin nambe daanggôôl silanêênd vakasin-ato be lava nama. ¹⁷De bôôy ond Anutu nêêl vulôôt nambe le dôôvu Abalaam-ate hil vu taamusin yiiy. Yoo nawiingin nambe taato yite kakook-anju langaah naambe me-le kaange yite vakasin-anju le, ondeey yoo nêêl niwêêk in nambe kaandu yite vakasin. ¹⁸^mOm gêên vakasin-anjo me-lohvu nambe kaange yi le, in Anutu me-lohvu nambe tatuhin vakasin-anjo le, manyinjo kaandu yiiy sen yapak-ambe yala nando nivasa having Anutuu-to niwêêk, in nambe mem yiiy monggatung mengg in nôôn keen sen Anutu nêêl nambe le bu vu yiiy-ato lôôt. ¹⁹ⁿOm vakasin sen Anutu jôôy-anju ond navu kaandu yalonggpayo nivasa lôôt, in nambe yame yalonggpayo yu-yuuh daka le, tombe yik Anutu-te vakasin jôôsin-anjo naandiy yiiy la vu Anutu. ²⁰^oIn Yesu yimb atombe tôômb diin sen naale hôôk dumb alôô-to kweek-ambe taato mop sen yana vu Anutuu-to vu yiiy. Yesu wiing nambêênjo be hôôvu yiiy om tu yêêv bop salivangin-ate, yik va timu nambe sen Melkisedek-ato, be nando in mando danggata osin danggata.

Melkisedek-anju tu kul vaha salivangin-ate ti be haale bop

7 ¹^pMelkisedek-anju ond tu omaaho lulemak vu taaku Saalem, tombe yik tu Anutu baandoni-te kul vaha ti keen-ambe natung salivangin vu yi. Tonde bôôy sen Abalaam yis ngaamong vu lulemak-aso vaalu be laanggôôl sil lung la, de lo-hato in naah baan atombe Melkisedek la tovu Abalaam vu mopaatôôv-ambe lohak yi. ²Tombe Abalaam hatung yite va pin lak lu nomaayuuh, tombe vu lu ti vu Melkisedek. Ke, yaanggilin haale Melkisedek-anju naambe omaaho lulemak vakasin anivalok keen-ate. Tonde angos having nambe omaaho lulemak vu taaku Saalem, manyinjo dangga nambe omaaho lulemak vakasin melaas-ate. ³^qMelkisedek-anjo ond mangganaan ayuuh tangganaan ma', tonde yite himbop-asos bôôy osin busin sen tangganaan hakôô-to ond ma having,

^k 6:14 Jen 22:16-17 ^l 6:16 Eks 22:10-11 ^m 6:18 Nam 23:19; 1 Sml 15:29

ⁿ 6:19 Lev 16:2-3,12,15 ^o 6:20 Hiblu 5:6 ^p 7:1 Jen 14:17-20 ^q 7:3 Saam 110:4;

Hiblu 5:5-6; 7:15-17 ^r **Hiblu 7:3** Vakasin sen nêêl nambe Melkisedek mangganaan ayuuh tangganaan ma ond dangga nambe yuuh haalend-ame neep hôôk Anutu-te kaapiya in nambe yanjak ni le, tonde yite hil haalend osin yite busin sen tangganaan hako yii-to osin busin sen yimb-ato ond yik me-neep hôôk kaapiya having e.

tonde yite busin sen yimb-ato ma having. Yik Melkisedek-anju taahu Anutu Noow kanu be tu kul vaha ti be natung salivangin vu Anutu nando danggata osin danggata.

⁴Ke, om yalak ni nambe Melkisedek-anju ond yi omaaho bopaata lôôt savok yate himbop Abalaam, ondeey Abalaam la yiis ngaamong-ande hako va nivasa vasa be hatiyy lak lu nomaayuuu, tombe vu lu ti vu Melkisedek. ⁵Tonde Yaakop noow Liwi yite hil moos vaalu sen latu kul vaha be datung salivangin vu Anutuu-to ond Mose-te tanasin nêêl nambe Islel ti ti pin gatiiy silate va pin mando lak lu nomaayuuu-maayuuu, tombe kul vaha sen datung salivangin-anjuuto gako lu ti ti vu sil, om yik dako vu sil oote halindin Islel-aso sen silate danggakook neep vu Abalaam having-ato. ⁶De Melkisedek ond me-yite hil Liwi sil e, lemu hako Abalaam-ate va lu ti, tonde Melkisedek lohak Abalaam sen Anutu jôôy vakasin lak yii-to. ⁷Tombe yalak ni vanuh nambe omaaho sen lohak angôô-to ond haale bop savok ango sen hako lohakin-ato. ⁸Hil Liwi sen dako va lu ti ti vu Islel-asôôto ond sil dayimb, lemu Melkisedek hako va lu ti vu Abalaam-ato ond vakasin neep hôôk kaapiya nambe nando metumin. ⁹Keen, hil Liwi ond dako hil Islel-ate va lu ti ti vêêl, le ma de Melkisedek haale bop kaluuh Liwi, in bôôy sen Melkisedek hako Abalaam-ate va lu tii-to, ond yik nambe sen hako Liwi-te va having. ¹⁰In hôôk busin sen Melkisedek tovu Abalaam neep mop-ambe Abalaam supin va me ti ti pin-ambe vu lu ti vu yii-to, ond Liwi yoo naahen naale hôôk kanu Abalaam alopayo.

**Yesu tu kul vaha moos-ambe hatung salivangin vu
Anutu lukalaah kul vaha-so bôôy ahendbaan**

¹¹Mose-te tanasin sen vu vu hil Islel-ato ond navu sapa kul sen hil Liwi-so datu kul vaha be datung salivangin vu Anutuu-to, om naambe silate kul lohvu nambe biing-ambe omaahonôôn pin anind vasa jak bulôôt, le sim nambe vaati sen kul vaha salivangin-ate ti yoow tok valup vu taamusin-anjo? Tombe yik yoo tu nambe sen Melkisedek-ato, de me-nambe sen Aalon-ate hil e. ¹²Om naambe kul vaha salivangin-ate moos ti lukalaam-ambe hako taaku, ond mam yik gilin tanasin bôôy-ambe naatu moos jak gaving. ¹³Omaaho sen Anutu nêêl vakasin lak yi bôôy-ato, ond me-vu hil Liwi-te le, nganjo yoo vu dangga ango sen sil ti me-tu kul vaha be hatung salivangin hôôk Anutu-te dumb alo busin ti le, malis. ¹⁴Yiyy oo alak ni lung la nambe yate Omaaho Bop ond yite dangga neep vu hil Yuda, de Mose me-nêêl vakasin lak hil Yudaa-ju nambe sil oo daatu kul vaha be gatung salivangin vu Anutu le, malis. ¹⁵Nganjo kul vaha salivangin-ate ango sen tok laam-anjo ond yik yoo tu nambe sen

^s 7:5 Nam 18:21 ^t 7:14 Jen 49:10; Ais 11:1; Mat 2:6; Taato 5:5

Melkisedek-ato, tombe vakasin-anjo dangga yoo neep langaah lôôt. ¹⁶Sen Yesu tu kul vaha salivangin-ate tii-to, ond me-sapa tanasin bôôy sen nêêl nambe hil Liwi mu yoo daatu kul vaha be gatung salivangin vu Anutu le, nganjo metumin danggata-te niwêêk wiing-ambe tu kul vaha salivangin-ate ti. ¹⁷"In Anutu nêêl nambe,

"Hong kul vaha salivangin-ate ti be goo le
mando danggata osin danggata naambe sen kul vaha
Melkisedek-ato."

¹⁸Ke, Anutu kavaayin tanasin bôôy lung la, in tanasin bôôy-anju niwêêk ma, om me-lohvu nambe dôôvu yiy e. ¹⁹"Mose-te tanasin-ame wiing-ambe omaaho ti tu omaaho nivalok vulôôt e, om Anutu samu mopaatôôv ango be savok tanasin la, tombe mop angôô-jo wiing-ambe mem yiy nalaam ngaaho vu Anutu.

²⁰De Anutu holin Yesu be tu kul vaha salivangin-ate tii-to ond me-holin malis e, nganjo yoo nêêl keen lôôt-ambe kaandu yite vakasin, de hil sen latu kul vaha bôôy-ambe datung salivangin-ato ond Anutu me-nêêl nambêênjo vu sil e, malis. ²¹"Lemu Anutu ond yoo nêêl keen lôôt-ambe Yesu tu kul vaha salivangin-ate ti. Yik Anutu yoo nêêl nambêênjo vu Yesu nambe,

"Yik sa Omaaho Bop, saanêêl keen lôôt lung la,
de me-lohvu nambe sa kaange vakasin e, om hong kul vaha
salivangin-ate ti be goo le mando danggata osin danggata."

²²^xOnd manyinjo Yesu navu taato vulôôt nambe vakasin moos sen Anutu jôôy-ato ond nivasa lôôt-ambe savok vakasin ango munggin-ato la.

²³Ke, bôôy ond omaahonôôn ngeeyaata datu Anutu-te kul vaha be datung salivangin, ond sil ngeeyaata

dawiiing kul-anju tave tave in dangga nambe dayimb, de me-dando danggata lôôt e, malis. ²⁴Nganjo Yesu ond mem tu kul vaha salivangin-ate vulôôt-ambe nando in mando monambiing kul hôôk Anutu me danggata-te, de omaaho ango me-le dukanaah ahembaan e, malis.

²⁵^yOm hil sen dawii-having Yesu be dalaam vu Anutuu-to ond yik Yesu yoo lohvu nambe gako sil pin landukanom vu Anutu bulôôt, be mem sil mando danggata, in yoo nando metumin danggata be mokataangg Anutu in nambe dôôvu sil.

Yesu tu yêêv bop salivangin-ate be yoo lohvu nambe dôôvu yiy keen

²⁶^zKe, yêêv bop salivangin-ate Yesuu-ju ond mem yoo lohvu nambe dôôvu yiy keen. Yi omaaho vaambuung-ambe lopayo yoo neep nivasa lôôt, de me-wiing vati paya le, osin me-lohvu hil anipayaya daka le, malis.

^u 7:17 Saam 110:4; Hiblu 5:6 ^v 7:19 Hiblu 9:9 ^w 7:21 Saam 110:4; Hiblu 5:6

^x 7:22 Hiblu 8:6; 12:24 ^y 7:25 Lom 8:34; 1Jon 2:1 ^z 7:26 Hiblu 3:1

Tombe Anutu hako yi lak savok baandoni lôôt. ²⁷aDe kul vaha-te yêêv-aso vaalu sen munggin-ato ond lak busin pin ond yoo datung salivangin-ambe davu kawiiy silate nipaya namunggin vêêl e, mem lalaah datung salivangin-ambe davu kawiiy hil-ate nipaya taamu. Nganjo Yesu ond yite kul-ame nambêênjo le, malis. Yik yoo hatung ninaavi la doos tu salivangin vu Anutu balon nôôn timu vulôôt atombe yik lung.

²⁸bBôôy ond Mose-te tanasin naholin omaahonôôn sen silanêênd niwêêk maa-to be datu kul vaha sen datung salivangin-ato silate yêêv bop. Ond Mose-te tanasin-anju neep munggin, le mem taamusin atombe Anutu holin omaaho ango be nêêl keen lôôt in kaandu yoo yite vakasin, ond yik holin Noow-ambe tu yêêv bop salivangin-ate. Yik Noow-anju sen yoo tu omaaho nivasa nôôn keen-ambe yoo le mando naambêênju danggata osin danggata.

Yesu tu yate yêêv bop salivangin-ate keen vu baandoni

8 ¹cVakasin sen yiiy naanêêl-anjo ond nôôn nambe yate yêêv bop salivangin-atêênju la nando Anutu nama vasa having yi vu baandoni lung la. ²Tombe tu yêêv bop salivangin-ate be nawiing kul hôôk Anutu-te dumb vaambuung vu baandoni. Dumb-anju va keen lôôt, omaahonôôn-ame lahaav ak namand e, malis, yik Omaaho Bop timu yoo haav.

³Tombe kul vaha sen datung salivangin-ato silate yêêv-aso pin ond silate kul nambe sil datung vanôôn osin davu kaasêêh vahivak anihees natu salivangin vu Anutu, om yik Yesu yoo hatung yite salivangin having nambêênju. ⁴Nambe mando voon ond me-lohvu nambe naatu kul vaha salivangin-ate ti le, in voon-anjo kul vaha sen

datung salivangin-ato dando lung la, be datung salivangin vaha vaha vu Anutu lohvu Mose-te tanasin nêêl-ato. ⁵dTombe latu kul vaha salivangin-ate be dawiiing kul hôôk Anutu-te dumb vu voon-anjo, ond davu taahu dumb vaambuung sen nando baandonii-to kanu. Lohvu vakasin sen Anutu vu kôôvu Mose hôôk busin sen Mose navu daav dumb sel-ato. Anutu nêêl nambe, “Goo naalum in gale samu va pin nohvu kanu sen sa taato vu hong vu kandu luu-to.” ⁶eLemu Kalisi hako kul yêêv bop salivangin-atêênju ond savok kul vaha vaalu sen

datung salivangin bôôy-ato silate kul la. In hako Anutu-te vakasin moos sen jôôy-ato be vu vu yiiy, ond vakasin-anjo nivasa lôôt savok vakasin ango munggin-ato la. Tombe yik vakasin moos-anjo nêêl Anutu-te nôôn anivasa lak yiiy, tombe manyinjo nivasa lôôt savok va sen nêêl ak yiiy munggin-ato la.

^a 7:27 Hiblu 5:3 ^b 7:28 Hiblu 5:1-2 ^c 8:1 Hiblu 1:3; 3:1; 10:12; 12:2 ^d 8:5 Kol 2:17; Hiblu 9:23; Eks 25:40 ^e 8:6 2Ko 3:6; Hiblu 7:22; 9:15

⁷Naambe vakasin sen Anutu jôôy bôôy-ambe Mose kaavuu-to nôôn keen ond me-lohvu nambe vakasin moos ango dukanom ahembaan e, malis. ^{8f}Lemu Anutu nêêl hil pin-ate va nipaya langaah nambe,

“Omaaho Bop nêêl nambe, ‘Busin ti le sale naanjôôy vakasin moos naah gaving hil Islel osin hil Yuda. ⁹Tombe vakasin moos sen sa naanjôôy-anjo ond me-le naambe sen saanjôôy bôôy vu silate himbop-aso le, malis. In bôôy saanjôôy vakasin having sil hôôk busin sen saapuvu hôôk sil namand-ambe saanggiy sil vu Ijip-ambe lalaa-to, le ma de sil-ame taamuyin sate vakasin sen saanjôôy-ato nivasa le, malis, ondeey sa haluuh damingg vu sil.’ Ke, yik Omaaho Bop nêêl nambêênja.

^{10g}Tonde yik Omaaho Bop nêêl having nambe, ‘Busin-anjo jung na vêêl e, mem sale naanjôôy vakasin moos ango gaving hil Islel jesin naah. Vakasin moos-anjo nambe sale baasu sate tanasin dukana sil alondpayo, tonde sa kaavu nanjip hôôk sil alund, tonde mem sa naatu silate Anutu, de sil daatu sate hil. ¹¹Tombe mem omaahonôôn ti ti pin ond sil-ame le taahu silate hil osin sil-ame le taahu halindin-ambe daanêêl naambe, “Ham oo anjak Omaaho Bop ani.” Malis, in busin-anju sil pin pasiv-ande bop, sil lalak sa ningg lung laa-to. ^{12h}Sil davu kalêêh tanasin, lemu sale sa kangg pasiv in sil, tonde sa kangg-ame le bu silate va nipaya jesin naah e.’ Ke, yik Omaaho Bop nêêl nambêênja.”

¹³Om Anutu nêêl yite vakasin moos-anju tombe wiing-ambe vakasin bôôy-ato nimbôôy ak, om va pin sen nimbôôy ak-ambe navu maahôôl laa-to, ond ngaaho lak in navu na menama valok-ate.

Kul vaha-sote yêêv sen datung salivangin bôôy-ato ond datung vahivak anihees natu salivangin

9 ¹ⁱVakasin ango munggin sen Anutu jôôy-ato ond Anutu nêêl tanasin vaalu lak sen hil lanohak vu yii-to, tonde nêêl ak dumb vaambuung sen nando voon-anjôôto having. ^{2j}Om sil lahaav dumb sel ti, tombe lopayo ango sen lom voon-ato ond kin tumin naale osin tavolo-ambe vanôôn balet sen datung nando hôôk Anutu mêê-to, ond nando hôôk dumb sel alopayo tii-ju sen danêêl nambe vaambuung-ato. ^{3k}Tonde sim sil lasi tôômb bopaata hilin lopayo ango, ond manyinju danêêl nambe taaku vaambuung keen lôôt. ^{4l}Tombe alata gool sen dasi va galovasa lak vu Anutuu-to ond nando hôôk lopayo tii-ju, de kalong vakasin jôôsin-ate nando having. Ond kalong-anju sil lasi gool-ambe paka hilin ninaavi

^f 8:8-12 Jer 31:31-34 ^g 8:10 Hiblu 10:16 ^h 8:12 Hiblu 10:17 ⁱ 9:1 Eks 26:1-30

^j 9:2 Eks 25:23-40 ^k 9:3 Eks 26:31-33 ^l 9:4 Eks 30:1-6; Eks 25:10-16; 16:33;

Nam 17:8-11; Diu 10:3-5

pin, tonde dêëngg gool ti latung vanôôn maana hôôk-ambe nando hôôk kalong-anju lopayo. Tonde lambe Aalon-ate haah sen vulak bôôy-ato osin tatuuh pataas yuuh sen Anutu kaavu vakasin jôôsin neep ak-ato, ond yik neep hôôk kalong-anju having. ^{5m}Angela nindoos kanu yuuh taahu Anutu-te nikaapul-is-ambe yuuh daale lak kalong-anju lu baandoni, be yuuh bees nawiing kôôh vu kalong sen davu kaasêêh vahivak anihees ak-ambe Anutu navu kawiiy nipayaa-to. Lemu gêên-anjo same le tatekin va pin-anju lôôt e.

^{6r}Ke, yik sil samu va pin nambêênju, tombe lak busin pin ond kul vaha sen datung salivangin-ato dalukala dumb sel-anju lopayo ango sen lom voon-ato be dawiiing silate kul hôôk. ^{7o}Nganjo kul vaha-sote yêêv bop salivangin-ate timu ond mem nalukala lopayo ango sen vaambuung keen lôôt-ato. Yik nalukala balon nôôn timu lak ta ti, lemu

me-nalukala malis amu le, nganjo nako vahivak anihees-ambe nalukala, tombe navu kaasêêh vahivak anihees-anju la vu Anutu in nambe kawiiy yite nipaya osin hil-ate va nipaya sen sil-ame dalak ni nivasa be dawiiing-ato ond kawiiy na. ^{8p}Ke, yik lak vaa-ja sen Vavi Vaambuung taato vu yiyy nambe dumb sel nando bôôy in tanasin nêêl kul ak-ambe hil daahen dawiiing-ato, om mopaatôôv sen yaandukana Anutu-te taaku vaambuung-ato me-katekin-ambe neep langaah e de yoo naahen. ^{9q}Dumb sel-anju ond yik navu taahu busin sen gêên-anjo, tombe silate kul-anju ond datung vanôôn osin davu kaasêêh vahivak anihees natu salivangin vu Anutu. Lemu salivangin-anju me-lohvu nambe samu omaahonôôn sen dako salivangin laam-ambe dalohak vu Anutuu-to londpayo be nivasa jak bulôôt e, malis. ^{10r}Yik silate kul dangga neep ak vanôôn yasin osin numin, tonde dalipis va yuuh ame in nambe Anutu ji sil anivasa, yik lak va sen yaningg naavi-têêto mu, tombe kul-anju neep in nambe na balup busin sen Anutu samu mopaatôôv ango moos-ato le mem.

Kalisi yoo kaasêêh nihees tu salivangin

^{11s} 'Gêên Kalisi lukalaam lung la be tu yêêv bop salivangin-ate be nawiing kul ak va nivasa pin sen tok laam lung laa-jo, tombe lukala dumb sel nivasa nôôn keen-ato lopayo, ond dumb-anju kaluuh dumb sel ango bôôy-ato la. Dumb sel ango sen baandonii-ju ond omaahonôôn-ame lahaav ak namand e, de va voon-amete va le, malis. ¹²De Kalisi me-hako bik memek anihees osin kao nituvakin anihees-ambe huli-la dumb vaambuung-anju le, malis. Nganjo yik yoo kaasêêh yite nihees tu

^m 9:5 Eks 25:18-22 ⁿ 9:6 Nam 18:2-6 ^o 9:7 Eks 30:10; Lev 16:2-34 ^p 9:8 Hiblu 10:19-20

^q 9:9 Hiblu 10:1-2 ^r 9:10 Lev 11:2,25; 15:18; Nam 19:11-13 ^s 9:11 Hiblu 3:1; 10:1

^t 9:11 Hiblu 8:5

salivangin, tombe yik huli-la dumb vaambuung-anju balon nôôn timu be hako yiyi laah in nambe yiyi mando danggata osin danggata. ¹³ "De naambe hil vaalu sen dayi sil nambe sil anind naavi nipaya lak, in lalôôh namand ak omaahonôôn yimbini ayuuh amêê-to, ond kul vaha sen datung salivangin-ato dako bik memek anihees having kao moow anihees, osin dako kao vêêh anituvakin sen dasi osin doos yêê-la kin-ambe navu tapuv-ato ngaasi be datung lukala bel, le mem datêêy ak hil sen dayi sil nambe sil anind naavi nipaya lak-ato, tombe mem sil anind vasa nalak. ¹⁴ "Lemu Kalisi nihees kaluuh-anju la, in Kalisii-ju va nipaya ti me-neep vu yi le, malis lôôt, de Vavi Vaambuung sen nando danggata osin danggataa-to, hôôvu be yoo vu yi laam doos-ambe tu salivangin la vu Anutu, om yite nihees-anju me-lipis yaningg naavi mu le, nganjo yoo lohvu nambe nôôh yiyi vêêl in kul sen yiyi naawiing in nambe bu metumin vu yiyi, le ma de yiyi navu ana mengg namaa-to, de mem yalonggpaya yoo nanjip nivasa lôôt in nambe yaambiing Anutu metumin-ate kul.

**Kalisi nihees kaasêêh-ambe wiing vakasin
moos sen Anutu jôôy-ato nôôn ak**

¹⁵ "Kalisi tu omaaho sen lukalaam naale Anutu be yiyi lavuun, tombe wiing-ambe vakasin moos sen Anutu jôôy-ato nôôn ak vu yiyi. Om yimb lung la in nambe nôôh hil pin vêêl in va nipaya sen sil davu kalêêh tanasin ango munggin-ato, in nambe hil sen Anutu teey sil-ambe nanyend vuun-ato, ond sil gako nôôn danggata sen Anutu nêêl bôôy nambe le bu vu yite noondin-asôôto.

¹⁶ Omaaho ti sahi nambe ngaaho lak in navu jimb om yoo le naanêêl yite va pin lak noondin anind, ond manyinjo nambe sen jôôy vakasin. Lemu sil-ame le gako yite va pavis e, nganjo jimb-ambe hil lanjak ni bulôôt naambe yimb lung laa-to le mem sil gako yite va nohvu vakasin sen jôôy-ato. ¹⁷ Ke, tombe omaahonôôn jimb vêêl e mem vakasin sen jôôy-ato nôôn nalak, le naambe naahen nando memoos, ond yite vakasin sen jôôy-ato neep malis amu, de me-nôôn ak e.

¹⁸ Om yik tanasin ango munggin sen Anutu jôôy-ato ond nêêl-ambe hil layiis vahivak-ambe kaasêêh nihees, le mem nihees wiing-ambe vakasin munggin-anju nôôn ak. ¹⁹ "Ke, Mose nêêl tanasin pin vu hil pin-ambe lung la, le mem hako bik memek anihees having kao nituvakin-ato nihees-ande bel, tonde hako bik sipsip anivalus

sen nihees-ato osin haah daka sen hisop-ato nama kaalok having, le mem laanggôôl lukala bik anihees-ambe têêy ak kaapiya bop osin lak omaahonôôn pin, ²⁰ de nêêl nambe, "Nihees-anju ond kaandu Anutu-te

^u 9:13 Lev 16:3,14-16; Nam 19:9,17-19; Hiblu 10:4 ^v 9:14 1Pi 1:18-19; 1Jon 1:7; Hiblu 6:1

^w 9:15 1Ti 2:5; Hiblu 8:6 ^x 9:19 Eks 24:3,6-8; Lev 14:4,6 ^y 9:20 Eks 24:8

vakasin jôôsin sen nêêl vu ham nambe ham taamuyin-ato.” ²¹ ^zTonde yik Mose la têêy vahivak anihees-anjo lak dumb sel-ato osin lak va sen dumb alôô-to pin lôôt in nambe Anutu ji nivasa. ²² ^aKeen, Mose-te tanasin neep ak va ngeeyaata lôôt nambe nihees nalipis atombe Anutu nayi nivasa, le naambe nihees-ame kaasêêh e, ond Anutu me-navu kawiiy omaahonôôn-ate va nipaya nala le, malis.

Kalisi yoo hatung yi tu salivangin in nambe kawiiy yate va nipaya na

²³ ^bKeen, Anutu-te dumb ayuuh ame vu voon-anjo ond navu taahu nôôn keen sen nando baandonii-to, tonde Mose têêy nihees ak dumb ayuuh ame vu voon-anjo be mem Anutu nayi nivasa, lemu salivangin sen kaluuh Mose-te salivangin-anjo la be nivasa lôôt-ato ond mem wiing-ambe Anutu nayi va yuuh ame vu baandonii-to nivasa. ²⁴ ^cIn Kalisi me-lukala dumb alo vaambuung sen omaahonôôn lahaav ak namand-ambe taahu taahu malis amu lak Anutu-te bayêên keen-ato le, malis. Nganjo yoo lukala baandoni vulôôt, tombe gêên la naale Anutu me be navu kataangg Anutu in yiiy.

²⁵ Ke, lak ta pin ond kul vaha sen datung salivangin-ato silate yêêv bop nako vahivak anihees-ambe nalukala natung salivangin vu Anutu hôôk dumb alopayo vaambuung-ato, de va nihees-anjo ond me-yoo yite nihees e. Lemu Yesu ond me-nawiing nambêênju le, nganjo yoo hatung yi doos tu salivangin vu Anutu balon nôôn timu, de me-hatung salivangin balon ngeeyaata le, malis. ²⁶ Nambe gatung yi naatu salivangin balon ngeeyaata ond yoo le monggako nivaane ngeeyaata lôôt vu nyendoos sen Anutu hatung ngaanggis-ato be naatok balup gêên-anjo, le ma de sim busin taamusin sen gêên-anjo, ond Kalisi lukalaam voon balon nôôn timu in nambe gatung yi na doos naatu salivangin vu Anutu in kawiiy yate va nipaya na.

²⁷ ^dHil pin e lanjimb balon timu, tombe sim taamusin e le lambiing vakasin. ²⁸ ^eTonde yik Kalisi ond hatung yi la doos vu Anutu tu salivangin balon timu in nambe kawiiy hil pin-ate nipaya na, tonde sim le nom gato balon ango ond manyinju me-le kawiiy va nipaya na le, nganjo yik gako hil sen dando mondanggin yii-to naah.

Salivangin bôôy ond me-lohvu nambe kawiiy va nipaya na bulôôt e

10 ¹ Mose-te tanasin-anju ond yaahe kanu malis amu taahu nôôn nivasa sen le naatok vu taamusin-ato. Tanasin-anju kanu malis amu, de me-kanu keen ti le. Mose-te tanasin nêêl nambe sil oo monggatung salivangin nanjip ti hôôk ta pin, om tanasin-anju me-lohvu

^z 9:21 Lev 8:15,19 ^a 9:22 Lev 17:11; Ep 1:7 ^b 9:23 Hiblu 8:5; 10:1 ^c 9:24 1; Jon 2:1

^d 9:27 Jen 3:19 ^e 9:28 Hiblu 10:10; Ais 53:12; 1Pi 2:24; Pil 3:20; 2Ti 4:8

nambe biing-ambe hil sen dako salivangin laam vu Anutuu-to daatu hil anivalok bulôôt e, malis. ²Le nambe tanasin nohvu naambe biing-ambe daatu hil anivalok bulôôt ond sil-ame datung salivangin yesin laah e. Nambe silate salivangin kawiiy silate va nipaya jung na bôôy ond sil sahi naambe va nipaya me-neep hôôk sil alondpayo le. ³Le ma de salivangin sen datung lak ta pin-anju navêêl sil alund ak-ambe kand navu silate va nipaya sen dawiiing-ato. ⁴In kao moow osin bik memek anihees ond me-lohvu nambe kawiiy va nipaya na le, malis. ⁵Om sen Kalisi laam voon-ato ond nêêl vu Anutu nambe,

“Ganimbaya nambe hil-ame lanyiis vahivak-ambe sil gatung salivangin vaha vaha le, nganjo osamu sa ningg naavi vu sa in nambe sa gatung naatu salivangin vu hong. ⁶Tonde vahivak sen dasi osin doos yêê-la kin-ambe natu salivangin-ato, osin salivangin sen datung in nambe kawiiy va nipaya naa-to ond game nawiingin e. ⁷Tombe saanêêl nambe, ‘O Anutu gangge, gêên sa laam-anjo in nambe saambiing va nohvu sen gakam navuu-to, yik lohvu sil kaavu vakasin lak sa be neep hôôk kaapiya bôôy-ato.’ ”

⁸Munggin ond Kalisi nêêl vakasin ak salivangin sen datung navu taamuyin Mose-te tanasin-ato nambe, “Ganimbaya nambe sil-ame lanyiis vahivak-ambe sil gatung salivangin vaha vaha le, de vahivak sen dasi osin doos yêê-la kin-ato, tonde salivangin sen datung in nambe kawiiy va nipayaa-to ond yik game nawiingin e.” ⁹Tonde sim nêêl ango laah nambe, “Gangge gêên sa laam-anjo in nambe saambiing va nohvu sen gakam navuu-to.” Om kawiiy mop munggin sen salivangin-atêêto la, de wiing Kalisi-te mop nanye vuun-ate lukalaah ahembaan.

¹⁰^hYesu Kalisi yoo taamuyin Anutu ka, om yoo vu naavi tu salivangin balon timu vulôôt, tombe yik wiing-ambe yaatu vaambuung.

Kalisi-te salivangin lohvu nambe kawiiy va nipaya na bulôôt

¹¹ⁱKe, kul vaha sen datung salivangin-ato ond sil pin daale dawiiing kul osin datung salivangin neep timu nalak busin pin, lemu salivangin pin-anju me-lohvu nambe kawiiy va nipaya na le, malis. ¹²Nganjo Kalisi ond mem hatung salivangin balon timu in nambe kawiiy va nipaya na, tombe Kalisi-te salivangin-anju mem yite niwêêk neep danggata. Wiing nambêênju tombe mem la nando Anutu nama vasa having yi. ¹³^kYoo nando monanggin busin sen Anutu biing-ambe hil sen dayi yi payaa-to langgulis yi vaalu kambi. ¹⁴De hil sen nawiing-ambe sil datu vaambuung-ato, ond wiing-ambe sil latu hil anivalok vulôôt lak yite salivangin timuu-to, be sil e mando naambêênjo danggata osin danggata.

^f 10:4 Hiblu 9:13 ^g 10:5 Saam 40:6-8 ^h 10:10 Hiblu 9:12,28 ⁱ 10:11 Eks 29:38

^j 10:12 Hiblu 1:3 ^k 10:13 Saam 110:1

¹⁵ Tonde yik Vavi Vaambuung nêl langaah vu yiy having, ond nêl vakasin ti nambe,

¹⁶ ^l“Omaaho Bop nêl nambe, ‘Busin-anju jung na vêl e, mem sale naanjôy vakasin moos ango gaving sil naambe sale baasu sate tanasin dukana sil alondpayo, tonde sa kaavu nanjip hôk sil alund.’ ”

¹⁷ Tonde yik nêl vakasin boow ti having nambe,
 “Sa kangg-ame le bu silate nipaya osin va sen sil davu kalêh tanasin-ato jesin naah e.”

¹⁸ Om sen Anutu kawiiy yate va nipaya lung la, ond kul sen gatung salivangin in nambe kawiiy va nipayaa-to ti me-neep yesin laah e.

Yaambiing gaving niwêek-ambe yana ngaaho vu Anutu

¹⁹ ^mOm halingg-aso, yik lak Yesu nihees timu om yiy aalohvu nambe yaandukana Anutu-te bayêen alo vaambuung-ato de yame aanjêen e. ²⁰ ⁿYaandukana bayêen alô-jû lak mopaatôv moos metumin-atêenju. Mop-anju ond Yesu yoo hataahin-ande kweek tômb bopaata ti sen naale nambe vinavii-to, be lukala lopayo vaambuung. Tômb tii-jû taahu Yesu naavi. ²¹ Yesu-jû tu kul vaha salivangin-ate osin haale bop-ambe nanggin Anutu-te hil pin. ²² ^oTonde Yesu têy yite nihees lak yiy, tombe wiing-ambe yalonggpaya nipayaa-to tu nivasa

lak, tonde yik lipis yiy naavingg ak bel anivasa, om yalonggpaya timu be yaambiing gaving keen-ambe yana ngaaho vu Anutu.

²³ ^pDe yiy natung mengg in Anutuu-to ond yiy oo monaanêl langaah-ande yame gavuuh daka le, in va pin sen Anutu nêl lung la nambe le biing-ato ond yik yoo le biing-ambe nôon jak keen lôôt. ²⁴ Om yiy akangg oo bu halingg-aso gaving-ambe yaambêl sil akand jak in sil ahend gaving hil-ambe lambiing va nivasa.

²⁵ ^qDe sen yiy naasupin-ambe yiy naalohak osin yiy naahe Sondaa-to, ond yame yanimbaya be yiy mando naambe sen hil vaalu dawiiing-ato le, malis, nganjo yiy kaandu yalonggpaya lak vakasin niwêek nohu busin pin, in ham alak ni nambe busin sen Yesu nom-ato ngaaho lak.

Yame galuuh damingg vu Anutu Noow e

²⁶ ^rYiy alak Kalisi-te vakasin keen-ato ni lung la, le sim taamusin naambe yalonggpaya la vu va nipaya be yiy sapa hôk yesin laah, ond salivangin ango me-neep in nambe kawiiy va nipayaa-jo na le,

^l 10:16-17 Jer 31:33-34; Hiblu 8:10,12 ^m 10:19 Hiblu 4:16 ⁿ 10:20 Mat 27:51;
 Hiblu 9:8 ^o 10:22 Lev 8:30; Esi 36:25; Ep 5:26 ^p 10:23 Hiblu 4:14 ^q 10:25 Hiblu 3:13
^r 10:26 Hiblu 6:4-8

malis. ²⁷Nganjo yale aanjêênin lôôt-ambe yiyi mongganggin busin sen yaambiing vakasin vu Anutu de kin anivaane ja yite vaavis pin-ato.

²⁸Omaaho ti nambe ji Mose-te tanasin naambe va malis-ambe kalêêh, tombe omaaho yuuh me yaal daatovu yi be daanêêl yite va nipaya sen wiing-ato langaah, ond me-kand pasiv in omaahôô-ju le, malis, yik yêêv-aso le daanêêl atombe lanyiiis-ambe jimb.

²⁹"Tonde ham akam navu nambe vaati lak hil sen daluuh damind vu Anutu Noow-ambe dayi nambe va malis-ato? Ke, hil sen daluuh damind-anju ond sil e daatovu nyevahaan bopaata lôôt, in Kalisi nihees sen wiing-ambe Anutu-te vakasin jôôsin moos-ato nôôn ak, ond wiing-ambe omaahôô-ju tu vaambuung, le ma de yi nambe va malis amu, tombe wiing Vavi Vaambuung sen samu samu danggakook-ato paya lôôt having. ³⁰"In yalak ni nambe Anutu yoo nêêl nambe, "Soo le aambu dôôk hil-ate nipaya nyevahaan in manyinjo yoo tu sate kul." Tonde nêêl angô laah nambe, "Sa Omaaho Bop, soo le sahi sate hil pin-ate vakasin." ³¹Keen, Anutu metumin-ate nama naatovu omaaho ti ond le nipaya valok.

Yiyi aambiing gaving niwêêk lôôt

³²Lemu ham akam oo bu bôôy sen ham atu Anutu-te hil amelangaah-ato, ond hôôk busin-anju ham hako nimeen ngeeyaata be wiingin nambe daanggôôl ham lôôt, le ma de ham oo naale niwêêk lôôt. ³³"Busango danêêl vakasin anipaya nalak ham osin dayiis ham ak hil pin amend, tonde sim busango ond ham navu kaandu hil vaalu sen hil dawiiing sil paya nambêênjôô-to. ³⁴"De ham akam pasiv in hil sen davu talu sil ak Kalisi haalêê-to be ham ahôôvu sil, tonde busin ti hil lavu vêêl hamate kupak ayuuh ame, lemu ham-ame ahe sil paya le, nganjo ham akam vasa. In ham alak ni nambe ham haalem ak Anutu-te nôôn lung la, ond nôôn-anjo nivasa lôôt savok va sen lavu vêêl-ato, tombe yoo le nanjip vu ham danggata-te.

³⁵Om ham-ame anjêênin e, nganjo ham oo baale niwêêk e mem ham e gako nôôn nivasa nyevahaan bopaata. ³⁶"Ham-ame nitambo jak e, nganjo ham alompayo na vu Anutu lôôt e mem ham e ambiing va nohvu Anutu ka, tombe mem ham gako nôôn anivasa sen Anutu nêêl bôôy nambe le biing vu ham-ato. ³⁷"Lohvu vakasin neep hôôk kaapiya nambe,

"Daka gaving e mem omaaho sen navu naam-ato ond le naam de me-le biing nime-meen e. ³⁸"De sate hil anivalok-aso londpayo le naam timu vu sa lôôt-ambe sil e mando metumin, le naambe sil ti jêênin-ambe seelin na in sa ond same le aangge yi nivasa le."

^s 10:27 Ais 26:11 ^t 10:28 Diu 17:6; 19:15 ^u 10:29 Eks 24:8; Hiblu 13:20

^v 10:30 Lom 12:19; Diu 32:36; Saam 135:14 ^w 10:33 1Ko 4:9 ^x 10:34 Mat 6:20; 19:21,29

^y 10:36 Luk 21:19; Hiblu 6:12 ^z 10:37 Hab 2:3-4 ^a 10:38 Lom 1:17; Gal 3:11

³⁹Lemu yame naayêênin e, om yame le ana mengg nama le, nganjo yalonggpayo la timu vu yi om yale mando metumin.

Va sen yiy naawii-having-ato danggaa-jo

11 ¹^bYalonggpayo la timu vu Anutu ond lohvu yalak ni vanuh nambe Anutu-te nôôn sen yiy natung mengg in-ato ond le bu vu yiy keen, tonde va sen yame aahe mengg ak-ato ond yalonggpayo yoo lak ni nambe nôôn keen nando. ²Hil vu bôôy ond londpayo la timu vu Anutu ondeey Anutu yi sil nivasas. ³^cDe yalonggpayo la timu vu Anutu om yalak ni lung la nambe Anutu hatung yendak osin ngaanggis lak yite vakasin amu, tonde va pin sen yiy naahe mengg ak-anjo ond Anutu samu lak va sen yame aalohvu nambe yaangge mengg jak-ato le.

Abel ayuuh Enok-ande Noa

⁴^dAbel alopayo la timu vu Anutu ondeey hatung salivangin vu yi, ond salivangin-anju nivasas savok Kain-ate salivangin. Keen, Abel alopayo la timu vu Anutu tombe yik lak danggaa-ja sen Anutu yi Abel anivasas nambe omaaho nivalok, ond manyinju taato langaah ak sen hako Abel-ate salivangin ak-ato. Tombe sim Abel yimb lemu lopayo la timu vu Anutu om haale yoo naahen neep.

⁵^eTonde Enok ond lopayo la timu vu Anutu om Anutu hako yi la baandoni osin memoos de me-yimb e, tombe hil oo mosalo yi lôôt, le ma de me-latokak e, in Anutu yoo hako la. Ke, tonde vakasin neep hôôk kaapiyas nambe, sen Anutu me-hako Enok la baandonii-to ond Enok oo monawiing va nalohvu Anutu ka be nayi yi nivasas. ⁶In hil sen londpayo me-la timu vu Anutuu-to ond sil-ame lalohvu nambe lambiing-ambe Anutu ji sil nivasas le, nganjo lana ngaaho vu Anutu ond sil lambiing gaving naambe Anutu nando keen, tonde yik

lambiing gaving naambe Anutu yoo navu nyevahaan nivasas vu hil sen davu salo yii-to ond mem.

⁷^fTonde Noa ond yik wii-having Anutu, om sen Anutu nêêl banye la vu in va sen navu naatok naam vu taamusin-ato, ond Noa me-yi me lak vaa-ju le, lemu nanye vuun in Anutu-te vakasin-ambe samu sip ti, ondeey yuuh vane be noondin ond sil lalukala dando nivasas, de nyevahaan-ame tovu sil e. Yik Noa lopayo la timu vu Anutu ond taato omaahonôôn pin vu voon langaah nambe nind paya om sil e gako nipaya nyevahaan, tonde sen Noa lopayo la timu vu Anutu ondeey Anutu nêêl Noa nambe omaaho nivalok.

^b 11:1 Lom 4:18; 2Ko 5:7 ^c 11:3 Jen 1:1; Saam 33:6; 2Pi 3:5 ^d 11:4 Jen 4:3-10

^e 11:5 Jen 5:24 ^f 11:7 Jen 6:13-22; 7:1; 1Pi 3:20; Lom 3:22; 4:13

Abalaam-ate vakasin

⁸Abalaam alopayo la timu vu Anutu, om sen Anutu teey Abalaam-ato ond Abalaam nanye vuun in Anutu lava be havuuh baan-ande kandi be la taaku sen Anutu navu bu vu yii-to. Abalaam doosin nambe na osin tana, le ma de lopayo la timu vu Anutu om yik yoo la. ⁹Lopayo yoo la timu vu Anutu om la nando taaku sen Anutu nêêl bôôy nambe bu vu yii-to. La nando taakuu-ju nambe sen vaatêêvak amu, tombe nando hôôk numang sel having Isak ayuuh Yaakop, in omaaho yuuh-anjo haalend ak taakuu-ju having yi, lohvu sen Anutu nêêl bôôy-ato. ¹⁰Abalaam monatung me in Anutu lôôt in nambe gako dukana taaku bop sen kaatum aniwêêk-ato, yik taaku sen Anutu yoo ka vu be haav-ato.

¹¹Tonde Saala ond tu vêêh tata lak lung la, lemu lopayo yoo la timu vu Anutu, tombe Anutu vu niwêêk vu yi be hako unoopasiv. Saala yoo ka vu nambe, “Anutu jôôy vakasin ak sa lung la nambe sa gako unoopasiv, om yoo le biing yite vakasin nôôn jak.” ¹²Om yik omaaho timu sen tata lak-ambe ngaaho lak in jimb naa-to, le ma de hil ngeeyaata lapumak yi. Sil latu ngeeyaata lôôt lalohvu matam sen nando yendak-ato, osin lalohvu laahel sen nando lôôy nanyendanggaa-to, tombe omaaho ti me-lohvu naasevin sil e.

¹³Hil pin-anju londpayo la timu vu Anutu be layimb osin, tombe hôôk busin-anju me-lako va nivasa sen Anutu nêêl bôôy nambe biing vu sil-ato le, malis. Yik layi nambe le nôôn jak vu taamusin, tombe kand vasa be lanêêl langaah nambe, “Hey nando voon-anjo lohvu vaatêêvak amu, de hey-ame hey ambaangg keen e.” ¹⁴Ke, hil sen dakaas nambêênjo ond taato nambe davu salo silate taaku nivalok. ¹⁵Le naambe kand navu silate taaku sen sil lavuuh bôôy-ande lalaam-ato, ond yik mop neep nambe sil e lanaah taakuu-ju jesin. ¹⁶Le ma de sil-ame lawiing nambêênjo le, malis. Yik sil alondpayo yoo la vu taaku baandoni sen nivasa lôôt savok taaku voon-anjôôto. Om sen sil lanêêl nambe silate Anutu yii-to ond Anutu me-yi sil nambe va malis-ambe tu ka in sil e, malis. Yik yoo samu taaku ti vu sil in nambe sil mando dôôk.

¹⁷Bôôy ond Anutu sahi Abalaam tombe lopayo la timu vu Anutu be hatung Isak tu salivangin. Yik Abalaam sen Anutu jôôy vakasin having yii-to, ond hatung noow nôôn timu tu salivangin vu Anutu. ¹⁸Tonde Anutu nêêl Isak-ate vakasin vu Abalaam munggin nambe, “Gate hil vu taamusin ond le daapumak Isak.” ¹⁹Om sen Abalaam hatung Isak tu

^s 11:8 Jen 12:1-5; Sin 7:2-4 ^h 11:9 Jen 26:3; 35:12,17 ⁱ 11:11 Jen 18:11-14; 21:2

^j 11:12 Lom 4:19; Jen 15:5; 22:17; Diu 10:22 ^k 11:13 Jen 23:4; 1Kro 29:15; Saam 39:12;

1Pi 2:11 ^l 11:16 Eks 3:6,15; Mak 12:26 ^m 11:17-18 Jen 22:1-14; Jem 2:21-22; Lom 9:7

ⁿ 11:19 Lom 4:17

salivangin-ato ond ka vu nambe, “Jimb ond lung, lemu Anutu lohvu nambe biing-ambe kandi jak naah vu hil yimbin-ate.” Om sen Isak kandi lak-ambe lom vu mangganaan-ato ond yik nambe sen kandi lak vu hil yimbin-ate.

Isak ayuuh Yaakop-ande Yusep

²⁰ Isak alopayo la timu vu Anutu ondeey lohak Yaakop ayuuh Esau. Lohakin-anju nêêl va sen taamusin e mem naatovu yuuh-ato.

²¹ Tonde Yaakop ond yik lopayo la timu vu Anutu, om ngaaho lak in nambe jimb atombe hatung vangavakin samu samu-te lak Yusep noow ayuuh, tonde dundak ak yite paatôôn alukook-ambe lohak vu Anutu.

²² Tonde Yusep ond yik lopayo la timu vu Anutu, om sen ngaaho lak in nambe jimb atombe nêêl nambe taamusin hil Islel e gavuuu Ijip-ande lana, tombe samu vakasin vu sil in nambe landaav kook.

Mose-te vakasin

²³ Mose mangganaan ayuuh tangganaan ond yuuh alondpayo la timu vu Anutu, ondeey yuuh-ame layêênin omaaho lulemak-ate vakasin e, in nêêl nambe vêêh Yuda gako noondin moow-aso ond lanyiis sil-ambe lanjimb. Le ma de Mose tangganaan hako yi tombe yuuh layi nambe unoopasiv anivasa om yuuh lavun lohvu kwaav yaal. ²⁴ Tombe yik Mose bop ak atombe lopayo la timu vu Anutu, om nimbaya nambe hil-ame daanêêl naambe Pelo nowaavêêh-ato noow yi le. ²⁵ Yik yoo wiingin nambe gako nimeen gaving Anutu-te hil Islel, de me-wiingin nambe sapa hôôk hil Ijip-ate mopaatôôv anipaya sen me-lohvu nambe biing-ambe omaahonôôn akand vasa lôôt-ato le. ²⁶ Ka vu nambe lambiing yi paya jak Kalisi haale ond

mem ka vasa savok sen gako mone osin Ijip-ate kupak ayuuh ame pin-ato, in ka navu nyevahaan nivasa sen Anutu le bu vu yii-to.

²⁷ Mose lopayo la timu vu Anutu om kandi be havuuu Ijip-ande la, tonde Pelo ahekalin-anju ond me-yêênin e. Omaaho ti me-lohvu nambe ji Anutu jak mekaalus e, lemu Mose ond nambe sen yi Anutu nôôn keen ak mêê-to ondeey yoo naale niwêêk lôôt.

²⁸ Mose lopayo la timu vu Anutu ondeey yi busin haluusin nyendoos-ato, om sen têêy bik sipsip anihees ak vinavi in nambe angela sen nyiis Ijip noondin tuk pin-ato ond galuuu Islel dôôk, de nama me-jak sil e.

° 11:20 Jen 27:27-29,39-40 ¨ 11:21 Jen 48:15-16 ¢ 11:22 Jen 50:24-25; Eks 13:19
 ´ 11:23 Eks 1:22; 2:2 * 11:24 Eks 2:10-12 ´ 11:26 Hiblu 10:34-35 " 11:27 Eks 12:51;
 Eks 14:13-14; Lom 1:20; 1Ti 1:17; Hiblu 11:1 ¨ 11:28 Eks 12:21-30

Hil Islel ngeeyaata lôôt londpayo la timu vu Anutu

29^wHil Islel alondpayo la timu vu Anutu ondeey Lôôy Hees vaahinin la vaalu vaalu de sil pin laloh kalesin, nambe sen laloh ngaanggis malis amuu-to be lala. Tonde hil Ijip lawiingin nambe taamuyin sil vahand va timu, le ma de lôôy yiis sil-ambe layimb valok-ate.

30^xTonde yik hil Islel ond londpayo la timu vu Anutu ondeey sil mondala be lambuuhin kaatum tatuuh aniwêêk vu Yeliko lohvu busin namaavaalu be vindak yuuh, le mem kaatum tatuuh-anju pakepin.

31^yTonde vêêh baayamb Lehap alopayo la timu vu Anutu be samu Islel ayuuh sen yuuh lalukala mondapooyak hil Yelikôô-juuto, om me-layiis yi be yimb having nanyend doos-asôônju le.

32 Om sale naanêêl vakasin vaati gaving? Nganjo taaku lung la om same le gatulin vakasin jak Gidion ayuuh Balak e, de Samson ayuuh Jepta le, de Devit ayuuh Samuel laving hil vaalu sen danêêl Anutu-te vakasin langaah-ato le, malis. 33^zIn hil-anjo ond londpayo la timu vu Anutu, om sil layiis ngaamong-ambe laanggôôl lulemak-aso ngeeyaata-te vaavis. Yik sil oo lawiing va nivalok, tombe latovu va sen Anutu nêêl nambe biing vu sil-ato. Tonde sil lawii-having-anju wiing-ambe voow anipaya layon avind doos ak in nambe me-ja sil e. 34^aDe laate sil yêê-la kin bopaata, le ma de kin-ame ya sil e, tonde lapak-ande yipak-ame lohvu nambe naatovu sil e. Silanêênd niwêêk ma, le Anutu nahôôvu sil-ambe nindwêêk nalak, tonde sil latu hil aniwêêk ngaamong-ate be latiiy hil taaku ango-te vaavis-ambe lapak-ambe lala. 35^bDe hil vaalu sen layimb-ato ond sil kandi lak laah vu hil yimbin-ate be taandin lako sil laah. Tonde hil vaalu ond vaavis lavu nivaane bopaata vu sil naavind-ambe lohvu nambe lanjimb, de naambe sil galuuh damind vu Anutu ond mem vaavis e gavuu sil na. Lemu me-lawii-having vaavis lavand e, malis, in kand navu nambe taamusin e sil e kandi jak vu hil yimbin-ate be sil mando metumin nivasa lôôt. 36^cDe sil vaalu ond danêêl vakasin palesin lak sil, osin daveek sil, tonde davu talu sil ak hees aniwêêk-ambe datung sil lukala kalaambus. 37^dDavu tanga sil vaalu lak tatuuh, tonde sil vaaluk davu katôôv sil la yuuh, tonde davu palapin sil vaalu, tonde dalu sil vaalu lak yipak diin-ambe dayimb. De hil sen lawii-having-ato vaalu davêêh bik sipsip osin bik memek aninaavi nambe tôômb-ato be mondatup hôôk dala, in sil dativak in va yuuh ame pin sen dôôvu sil naavind-ato, tonde hil dawiiing nindanjeen vu osin dawiiing sil paya valok-ate lôôt. 38 Tombe sil lavuuh taale be lala dahôôpis vu taaku lu malis, tonde dahôôpis vu

^w 11:29 Eks 14:21-31 ^x 11:30 Jos 6:12-21 ^y 11:31 Jos 2:1-21; 6:21-25; Jem 2:25

^z 11:33 Dan 6:22 ^a 11:34 Dan 3:23-27 ^b 11:35 1King 17:17-24; 2King 4:18-37

^c 11:36 1King 22:24-27; Jer 20:2; 37:15; 38:6 ^d 11:37 2Kro 24:21

kandu osin dahôôpis hôôk lavandangga de ngaanggis vuun. Sil-anju nind vasa lôôt, om hil anipaya voon-ate nind baya in sil.

³⁹Keen, hil pin-anju ond londpayo la timu vu Anutu ondeey Anutu yi sil nivasa, lemu me-lako nôôn nivasa sen Anutu nêêl bôôy nambe bu vu sil-ato le. ⁴⁰In vu bôôy lôôt ond Anutu yoo samu nôôn nivasa ti vu yiyi, om ka vu nambe hil sen londpayo la timu vu yi bôôy-ato ond me-biing-ambe sil daatu hil anivasa bulôôt naamunggin yiyi e, malis, nganjo le biing-ambe yiyi ahondoos e naatu hil anivasa bulôôt javuh ti.

Yamengg oo sapa Kalisi be yaambiing gaving yi

12 ¹Ke, om hil ngeeyaata lôôt sen londpayo la timu vu Anutu bôôy-anjuuto ond silate vakasin neep in nambe kaandu yiyi. Om nambêênja yiyi gavuuu va pin sen nahilin yiyi-ato, osin va nipaya pin sen nawiing-ambe yiyi naalupakêê-to na vêêl, tonde yame yanitambo daka le, nganjo yiyi oo monggatup lôôt sapa mopaatôôv sen Anutu nêêl ak yaningg in nambe yiyi gatup-ato. ²Yik yamengg oo na nivalok vu Yesu sen yoo nawiing-ambe yiyi naawii-having yii-to, tombe yoo le biing-ambe yaanyis nôôn anivasa keen. In bôôy ond Yesu yoo ka vu nambe taamusin e le ka vasa lôôt, om yik yoo puvu yi hôôn-ambe vaaku nimeen, tombe yimb ak haah pako de me-yêênin haah pako-te nimumin e, om gêên la nando Anutu nama vasa having yi.

Anutu navu nimeen vu yiyi in nambe dôôvu yiyi

³Ham akam oo bu Yesu sen hil anipaya lawiing nindanjeen vu yi lôôt-ato, le ma de yoo naale niwêêk, om yik ham-ame nitambo jak-ambe ham-ame anjêênin e. ⁴Ham nawiing ngaamong in nambe ham daanggôôl va nipaya, lemu ham-ame awiing lôôt-ambe ham anihees-ame kaasêêh laam e. ⁵Mak ham akam lingin vakasin sen Anutu nêêl vu ham in nambe kaandu ham-ato? Yik yoo nêêl ham nambe yite noow-aso ham, nambe,

“Noongg-aso, naambe Omaaho Bop bu nivaane ti vu ham in nambe dôôvu ham, ond ham-ame angge naambe va malis e, de naambe nyiis ham, ond ham-ame angge paya le. ⁶In Omaaho Bop ahe naving omaaho ti ond navu nimeen vu yi, yik hil pin sen nako sil ak nambe noow-aso sil-ato ond naveek sil.”

⁷Om naambe Omaaho Bop nyiis ham ond ham oo baale niwêêk, in Anutu nawiing va vu ham lohvu yite noow-aso, de unoopasiv lati yoo nando de mangganaan-ame nayiis e? Malis. ⁸Yik maandin pin oo daveek noondin, om naambe Anutu me-nyiis ham e, ond ham-ame atu yite

^e 12:1 Lom 7:21; 1Ko 9:24-25; Hiblu 10:36 ^f 12:2 Hiblu 1:3 ^g 12:5 Pro 3:11-12

^h 12:6 Taato 3:19 ⁱ 12:7 Diu 8:5; 2 Sml 7:14

noow-aso keen e, malis, nganjo ham oo alohvu unoopasiv sen maandin maa-to mu. ⁹Tonde yik yiy mangg-aso vu voon ond daveek yiy atombe mem yiy nanyengg vuun vu sil, om nambêênjo yiy oo aanggulis yate Aamangg Anutu baambu, le mem yale mando metumin. ¹⁰Ke, yiy mangg-aso vu voon-anjo ond daveek yiy pasivdaka mu lohvu sil oo kand, nganjo Anutu ond mem navu nivaane vu yiy in nambe dôôvu yiy-ambe yiy naatu vaambuung naambe yi. ¹¹Sen mangg-aso daveek yiy-ato ond yame yakangg vasa le, malis, yalonggpayo nimeen amu, le sim taamusin yiy sen yiy hango nivaane lung laa-to ond yalonggpayo melaas ak-ambe yiy naawiing va nivalok.

Anutu sahi yiy ond yiy baale niwêêk

¹²^kHam namam yimb-ambe taaluhin ond ham talo be ham ambiing kul, tonde naambe ham vaham kopak

ond ham balaah niwêêk. ¹³^lTombe ham vaham oo sapa mop sen nivalok-ato in naambe omaaho ti vaha wiing paya ond vaha kaatu me-biing paya lôôt e, malis, yik le nivasa dôôk naah.

¹⁴^mTonde ham oo sapa hôôk mop sen ham ambiing va osin melaas gaving hil pin-ato, tonde ham mando osin ham alompayo nivasa nôôn, in hil sen londpayo me-nivasaa-to ond me-le lanjî Omaaho Bop e. ¹⁵ⁿOm ham ganggin ham nivasa in omaaho ti le galuuh dami vu Anutu-te samu samu, tonde ham ti le naambe haah anipaya be balup hôôk ham lavuun, tombe yite nôôn e nikalin vu ham-ambe ham pin naatu nipaya gaving. ¹⁶^oTonde sim ham ganggin ham in omaaho ti le sapa hôôk mopaatôôv baayamb, de ango galuuh dami vu Anutu naambe sen Esau haluuh dami vu gambum sen Anutu nêêl-ambe dawiiing vu noondin tuk-aso pin-ambe dako sil haalend ak-ato, om vu gambum-anju lukalaah hali ngo miin, be miin vaanggo lak vanôôn balon timu be hali tuk ya. ¹⁷^pTombe taamusin wiingin nambe gako samu samu-ju naah, le ma de mangganaan-ame liinggis e, tombe Esau su lôôt in nambe gako yi jak, le ma de me-tokak yinêên mopaatôôv sen gilin lopayôô-to le, ma.

Yiy aatok alaam kandu Saion nivasa keen-ato lung la

¹⁸^qGêên ham-ame nambe hil Iselê bôôy-ambe ham valu-nando ngaaho vu vati lohvu ham gambe namam jak e, malis. In sil lalup ngaaho vu kandu Sinai osin kin bopaata de mekanu doos-ato osin vavi jmbe, ¹⁹^rtonde vuuk su osin lava ti vakaas-ambe sil lango be sil kataangg nambe sil anind baya nambe sil-ame gango lavaa-ju jesin naah e. ²⁰^sSil

^j 12:11 Jem 3:17-18 ^k 12:12 Ais 35:3 ^l 12:13 Pro 4:26 ^m 12:14 Saam 34:14; Lom 12:18

ⁿ 12:15 Sin 8:23 ^o 12:16 Jen 25:33-34 ^p 12:17 Jen 27:30-40 ^q 12:18 Eks 19:16-20;

Diu 4:11-12 ^r 12:19 Eks 20:18-21; Diu 5:22-27 ^s 12:20 Eks 19:12-13

layêênin lôôt in lango Anutu nêêl vakasin-anjo nambe, “Omaaho ti nambe gambe nama jakana kanduu-ju ond ham tanga yi jak tatuuh-ambe jimb, tonde bik ayuuh ame ti na balup kanduu-ju ond yik ham tanga jak tatuuh gaving.” ²¹ ‘Sil layi vaa-ju tombe layêênin lôôt, tombe yik Mose nêêl having nambe, “Saayêênin atombe saahees lôôt.”

²² “Ham-ame valup ngaaho lak in va nambêênju le, nganjo ham valup kandu Saion osin Anutu metumin-ate taaku bop Yelusalem sen nando baandonii-to, taakuu-ju angela lakaneep omaaho-maaho dasupin-ambe dapêêlis dando. ²³ “Ham valu-vu Anutu nowaatuk-aso sen Anutu kaavu sil haalend-ambe neep baandoni lung laa-to, tonde ham valu-vu Anutu sen nangoyin hil pin-ate vakasin-ato, osin ham valu-vu hil sen Anutu nêêl sil bôôy nambe hil anivalok-asôôto kanund, ond Anutu wiing-ambe nind vasa lak keenaanôôn-ambe dando. ²⁴ “Tonde ham valu-vu Yesu sen wiing-ambe vakasin moos sen Anutu jôôy-ato nôôn ak vu yiyi, osin ham valu-vu Yesu-te nihees sen bôôy têêy ak ham-ande wiing-ambe Anutu yi ham nivasaa-to, tonde Yesu-te nihees-anju teey kôôk anivasa savok Abel-ate nihees bôôy-ato.

Yiyi oo ganggin yiyi nivasa

²⁵ “Ham ganggin ham-ande ham-ame galuuh damim vu Anutu sen nanêêl vakasin vu ham-ato le. In bôôy

ond Anutu nêêl vakasin aniwêêk vu voon, le ma de sil laluuu damind vu, tombe bôôy-anju ond sil-ame lalohvu nambe dapak e, om sil latovu silate nipaya nyevahaan. Tombe yik gêên Anutu nando baandoni be nanêêl vakasin aniwêêk, om naambe yiyi galuuh damingg vu ond mak yaalohvu nambe yiyi napak-ambe yaanoh nanye in yate nipaya nyevahaan a? Malis lôôt. ²⁶ “In bôôy ond Anutu lava wiing-ambe ngaanggis taapinin, nganjo gêên ond nêêl banye langaah vu yiyi nambe, “Sale taapinin ngaanggis balon ango naah, lemu me-ngaanggis amu le, nganjo sale taapinin ak ngaanggis-ambe yendak gaving.” ²⁷ Ke, vakasin sen nêêl nambe balon ango naah-ato ond taato vu yiyi nambe va yuuh ame sen Anutu hatung bôôy-ato ond le taapinin-ambe na menama, nganjo va sen taapinin e ma de baale niwêêk-ato ond le mando. ²⁸ In yaalukalaam taaku sen yiyi mando danggata-têênjo ond omaaho ti me-lohvu nambe taapinin ak e, om yiyi oo naapêêlis vu Anutu in vaa-jo, tonde yiyi oo aanohak vu, de yaambiing yite kul nohvu sen yoo ka navuu-to, tonde yaanjêênin yi be yiyi gako haale jak. ²⁹ “In yate Anutu ond lohvu kin tumin bopaata sen naya va yuuh ame pin-ato.

‘ 12:21 Diu 9:19 “ 12:22 Gal 4:26; Taato 5:11 “ 12:23 Luk 10:20 “ 12:24 Hiblu 8:6; 10:22; 1Pi 1:2; Jen 4:10 * 12:25 Hiblu 2:1-3; 10:28-29 “ 12:26 Eks 19:18; Saam 68:8; Hag 2:6 “ 12:29 Diu 4:24; 9:3; Ais 33:14

Yahengg oo gaving halingg-aso

13 ^{1a}Ham sen ham atu Kalisi-te hil lung laa-to ond ham ahem oo monggaving mango-so. ^{2b}Tonde vaatêêvak-aso ond ham gako sil lanjaksana hamate bayêên-ambe ham ganggin sil nivasa, in hil vaalu lako vaatêêvak-aso lak nambêênju bôôy, tombe silate vaatêêvak-asôônju ond sil angela, lemu hil-anju doosin, in sil akand vu nambe manyinjo omaahonôn heey.

^{3c}De ham akam oo bu mango-so sen dando hôôk kalaambus-ato be ham baaku nimeen gaving, yik nambe sen ham ahondoos oo nando hôôk kalaambus-ato. Tonde ham oo kam pasiv in hil sen vaheey dawiing nindanjeen vu sil-ambe nind naavi nango nivaane lak Kalisi haalêê-to, in yik ham ahondoos anim naavi voon-ate neep ti.

^{4d}De ham moow ayuuh vêêh pin sen ham hako ham lung laa-to, ond ham amem oo sapa ham nivasa, de ham-ame ambiing va nipaya le. In taamusin ond Anutu le bu nipaya nyevahaan dukanaah vu hil sen dawiing kand yuuh-ato osin vu hil baayamb.

^{5e}Tonde ham-ame ambiing menôn in mone le, nganjo va sen nando vu ham-ato ond ham alompayo nivasa naambe lung, in Anutu nêêl lung la nambe, “Same le gavuuu hong e. Keen, same le galuuh damingg vu hong e, malis lôôt.” ^{6f}Om yik yiyi oo naanêêl osin yalonggpayo timu naambe, “Omaaho Bop oo nahôôvu sa om same le aanjêênin e, in hil e lambiing vaati vu sa?”

Yiyi oo sapa hôôk yêêv-aso bôôy vahand

^{7g}Ham akam oo bu hamate yêêv-aso bôôy sen lanêêl Anutu-te vakasin vu ham-ato, osin ham akam bu silate mopaatôôv sen sil sapa be silate kul nôôn ak-ato, tombe yik ham sapa sil vahand-ambe ham ambiing gaving naambe sen sil dawii-having-ato. ⁸In Yesu Kalisi yoo nawiing va nivalok amu vasêên-ande gêên-ambe danggata osin danggata. ^{9h}Hil vaalu-te kakook vaha vaha le balup, lemu ham-ame sapa de ham gavuuu Anutu-te mopaatôôv e, nganjo Anutu-te samu samu kaandu ham alompayo ond mem nivasa, de yalonggpayo me-gako niwêêk vu tanasin sen lak vahivak vaha vahaa-to le, in hil sen davu sapa hôôk tanasin lak vahivak ayuuh amêê-to ond me-nahôôvu sil e.

Salivangin anivasa sen Anutu nawiing-in-ato

¹⁰Yesu tu yate salivangin in nambe kawiiy yate va nipaya naa-to, lemu hil sen davu samu dumb sel-ate kul-ato ond me-lalohvu nambe

^a 13:1 Jon 13:34 ^b 13:2 Lom 12:13; 1Pi 4:9; Jen 18:1-8; 19:1-3 ^c 13:3 Mat 25:36;

Hiblu 10:34 ^d 13:4 Gal 5:19,21; Ep 5:5 ^e 13:5 1Ti 6:8; Diu 31:6,8; Jos 1:5

^f 13:6 Saam 118:6 ^g 13:7 1Ko 4:16; Hiblu 6:12 ^h 13:9 Ep 4:14; Lom 14:17

gako yate salivangin-anju daka be lanja le. ¹¹ⁱTonde kul vaha sen datung salivangin-ato ond silate yêêv bop nako bik sipsip osin kao nihees-ambe nalukala dumb alopayo ti sen vaambuung-ato be mem natung salivangin in nambe kawiiy nipaya na, tonde bik naavi sen taahu taahu lak omaahonôôn-ate va nipayaa-to ond dako be lala dasi lak kin vu taaku nanyendangga be navu tapuv la. ¹²^jOndeey Yesu ond yik hako nivaane be yimb ak haah pako neep taaku nanyendangga, in nambe yite nihees kawiiy omaahonôôn-ate va nipaya na. ¹³^kOm yik yiyi having, yana taaku nanyendangga be yiyi baaku nimeen gaving Yesu. ¹⁴^lIn yalak ni nambe yambaangg dangga dosin-ato me-neep vu voon-anjo le, nganjo yiyi oo monaawiingin yambaangg keen sen yoo naahen-ato. ¹⁵^mOm yiyi oo naapêêlis na vu Anutu lak Yesu haale, tombe pêêlisin-anjo yaambu vu Anutu naatu salivangin jak busin pin, tonde yavingg oo gako haale jak. ¹⁶ⁿTonde ham akam-ame jingin samu samu osin ngaatum sen ham andôôvu mango-sôôto le. Yik va sen nando vu ham-ato ond ham ambu vaalu na in dôôvu hil sen dativak in va yuuh amêê-to, in Anutu yoo nawiingin samu samuu-ju nambe salivangin anivasa.

¹⁷^oDe hamate yêêv-aso ond dahôôvu ham-ambe danggin ham lohvu busin pin, tonde taamusin ond sil e tatekin kul pin sen dawiiing vu ham-ato vu Anutu, om yik ham oo nanyem vuun vu sil-ambe ham anggulis sil baambund. Ke, ham ambiing naambêênjo ond mem sil e lambiing silate kul lôôt osin kand vasa, tombe vaa-ja le samu ham nivasa, de sil alondpayo me-le nimeen e.

Ham anohak in Anutu dôôvu hey

¹⁸^pHam akam oo bu hey hôôk lohakin, in hey alak ni nambe hey alonggpayo yoo neep nivalok hôôk Anutu me, in hey naawiingin nambe hey aambing va nivalok amu jak busin pin. ¹⁹Om sa kataangg ham naambe ham anohak in Anutu dôôvu sa be saanos balu-vu ham pavis.

²⁰^qAnutu sen vakasin melaas danggakook-ato ond wiing-ambe yate Omaaho Bop Yesu kandi lak vu hil yimbin-ate. Yesuu-ju ond tu bik sipsip-asote heendin bop lak sen kaasêêh yite nihees-ambe wiing vakasin sen Anutu jôôy-ato neep niwêêk. ²¹Ond Anutuu-ju yoo biing samu samu nivasa vasa pin vu ham, in nambe ham ambiing va nohvu sen ka navuu-to, tonde biing-ambe Yesu Kalisi-te kul nôôn jak hôôk yalonggpayo, nohvu sen Anutu nayi nivasaa-to, tombe mem yiyi gako Yesu Kalisi haale jak naatu bopaata be nanjip danggata osin danggata. Keen.

ⁱ 13:11 Lev 16:27 ^j 13:12 Mat 21:39; Jon 19:17 ^k 13:13 Hiblu 11:26; 12:2; Mat 7:13-14 ^l 13:14 Hiblu 11:10,16; 12:22 ^m 13:15 2Kro 29:31; Saam 50:14,23; Hos 14:2 ⁿ 13:16 Pil 4:18 ^o 13:17 Esi 3:17; 1Tes 5:12 ^p 13:18 Sin 24:16; 2Ko 1:12 ^q 13:20 Sek 9:11; Ais 55:3; Jer 32:40; Esi 37:26; 1Pi 2:25

Vakasin ahus

²²Halingg-aso, sa naanêêl niwêêk naambe ham oo gatung nanyem in vakasin sen sa naanêêl in nambe kaandu ham ak-anjo, yik kaapiya sen sa kaavu laas vu ham-anja ond yik ngaaho daka mu. ²³In saawiingin nambe ham anjak ni naambe sil kavaayin yiy halingg Timoti de me-nando hôôk kalaambus laah e, om naambe naatok balu-vu sa pavis ond mem haay ahondoos e anaas aangge ham.

²⁴Ke, om ham naanêêl sa lavangg samu samuu-jo vu hamate yêêv-aso pin osin ham naanêêl vu Anutu-te hil. Tonde hil sen latu Kalisi-te hil-ambe dando Itaali nganjôô-to lanêêl vakasin samu samu laas vu ham having.

²⁵Yik vakasin lung laa-ja. Anutu-te samu samu naas mando gaving ham pin.